

PENUBUHAN BANK ISLAM

18 Zulhijjah 1444H/07 Julai 2023

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ
أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يُضِلِّ اللَّهُ فَلَا هَادِيَ لَهُ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فَيَا عِبَادَ اللَّهِ، اتَّقُوا اللَّهَ وَأَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Subhanahu wa-Ta'ala di dunia dan akhirat.

Sidang Jumaat yang dirahmati Allah Subhanahu wa-Ta'ala

Perbankan Islam di Malaysia mencapai usia 40 tahun sejak bermulanya beroperasi perniagaan Bank Islam Berhad pada 01 Julai 1983. Oleh itu, marilah kita bersama-sama mensyukuri nikmat pencapaian ini

kerana ia merupakan peneraju kepada pembangunan institusi perbankan dan kewangan Islam di negara kita.

Sehingga kini terdapat 26 institusi perbankan dan kewangan Islam di Malaysia yang seharusnya menjadi pilihan wajib bagi masyarakat Islam untuk menguruskan pelbagai keperluan kewangan mereka. Pencapaian ini menzahirkan komitmen kerajaan dan industri untuk memperkasakan sektor perbankan yang mematuhi syariat agama kepada segenap masyarakat tanpa mengira latar belakang agama dan kaum.

Penglibatan individu muslim dalam ekosistem perbankan Islam sama ada sebagai pelanggan mahupun penyedia perkhidmatan adalah menepati perintah Allah Subhanahu wa Taala untuk kita meninggalkan segala amalan yang melibatkan dosa besar seperti riba.

Sidang Jumaat yang dirahmati Allah Subhanahu wa-Ta'ala

Ingatlah Allah Subhanahu wa Taala dan Rasul-Nya telah mengisytiharkan perang kepada yang meneruskan amalan riba melalui firman-Nya dalam surah al-Baqarah ayat 278 hingga 279 :

أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا اتَّقُوا اللَّهَ وَذَرُوا مَا بَقِيَ مِنَ الرِّبَا إِن كُنْتُمْ مُؤْمِنِينَ ﴿٢٧٨﴾ فَإِن لَّمْ تَفْعَلُوا

فَأَذْنُوبُ حَرْبٍ مِّنَ اللَّهِ وَرَسُولِهِ ^ط وَإِن تَبْتَغُوا فَلََكُمْ رُوُسُ أَمْوَالِكُمْ لَا تَظْلِمُونَ وَلَا

تُظْلَمُونَ ﴿٢٧٩﴾

Yang bermaksud: “Wahai orang yang beriman! Bertakwalah kamu kepada Allah dan tinggalkanlah (jangan menuntut lagi) saki baki riba (yang masih ada pada orang yang berhutang) itu, jika benar kamu orang yang beriman. Oleh itu, kalau kamu tidak juga melakukan (perintah mengenai larangan riba itu), maka ketahuilah kamu: akan adanya peperangan dari Allah dan Rasul-Nya, (akibatnya kamu tidak menemui selamat). Dan jika kamu bertaubat, maka hak kamu (yang sebenarnya) ialah pokok asal harta kamu. (Dengan yang demikian) kamu tidak berlaku zalim kepada sesiapa, dan tidak perlu dizalimi”.

Ayat ini menunjukkan betapa besarnya dosa riba di sisi Allah Subhanahu wa Taala dan ianya tidak boleh dipandang remeh sama sekali. Maka kita hendaklah bersungguh-sungguh memastikan agar diri kita dan insan tersayang tidak berada dalam golongan yang dimurkai Allah Subhanahu wa Taala dan Rasul-Nya akibat terjerumus dalam dosa riba.

Ingatlah bahawa harta benda yang kita miliki di dunia adalah ujian terhadap tahap ketaatan kita kepada Allah Subhanahu wa Taala dan ianya boleh menjadi asbab kepada kurniaan rahmat dan keberkatan daripada Allah

Subhanahu wa Taala . Baginda Nabi Sallallahu Alaihi Wasallam telah bersabda dalam hadis yang diriwayatkan Imam Muslim:

Yang bermaksud: *“Dari Jabir (diriwayatkan bahawa) ia berkata : “ Rasulullah Sallallahu Alaihi Wasallam melaknat pemakan riba, yang memberikannya, pencatatnya dan saksi-saksinya. Baginda mengatakan, “mereka itu sama.”*

Sidang Jumaat yang dirahmati Allah Subhanahu wa-Ta’ala

Perbankan Islam mempunyai hubungan terus dengan ekonomi dan terhindar daripada unsur-unsur ketidakpastian dan tidak beretika, berunsurkan ketelusan, keadilan dan keterbukaan serta sentiasa prihatin dengan keperluan pelanggannya.

Faedah yang diperolehi daripada institusi kewangan Islam akan diagihkan dalam bentuk zakat atau sokongan lain yang bertujuan untuk menambah baik kehidupan dan masa depan. Selain itu, pelaksanaan sistem Islam memerlukan iman dan takwa dalam diri dengan sentiasa sedar bahawa setiap peraturan Allah adalah amanah. Oleh yang demikian, setiap amanah Allah Subhanahu wa Taala tidak akan dipandang rendah oleh setiap mukallaf yang bertakwa. Marilah kita bersama-sama mencari keredaan Allah Subhanahu wa Taala dengan mengamalkannya.

أَعُوذُ بِاللَّهِ مِنَ الشَّيْطَانِ الرَّجِيمِ

يَمَحَقُ اللَّهُ الرِّبَا وَيُرِي الصَّدَقَاتِ وَاللَّهُ لَا يُحِبُّ كُلَّ كَفَّارٍ أَثِيمٍ ﴿٢٧٦﴾

Yang bermaksud: “ Allah Subhanahu wa Taala menyusutkan (kebaikan harta yang diuruskan dengan mengambil) riba dan Dia mengembangkan (berkat harta yang dikeluarkan) sedekah dan zakatnya. Allah Subhanahu wa Taala tidak suka kepada orang yang terus kekal dalam kekufuran dan selalu melakukan dosa.”

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ
السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ،
وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ،
فَأَسْتَغْفِرُوهُ إِنَّهُ هُوَ الْغَفُورُ الرَّحِيمُ.